



**PRIMEIRU-MINISTRU**

**DISKURSU**

**SUA EXELÉNSIA PRIMEIRU-MINISTRU REPÚBLIKA  
DEMOKRÁTIKA TIMOR-LESTE  
KAY RALA XANANA GUSMÃO**

**IHA SIMEIRA ASEAN – KANADÁ**

**Jakarta, Indonézia, laron 6 fulan-setembru tinan 2023**

Obrigadu, Señor Presidente

Vosa Majestade

Exelentísimus Líderes ASEAN,

Exelentísimu Primeiru-Ministru Kanadá,

Distintas Señorras no Señores,

Permite ha'u hodi hahú hato'o ha'u-nia sinseru apresu ba Señores Koprezidentes tanba fó ona oportunidade ba Timor-Leste hodi observa diretamente oinsá parseria entre ASEAN ho Kanadá ne'ebé iha ona progresu iha tinan ida-ne'e. Ha'u hakarak hato'o ami-nia sinseru apresu ba Repúblika Indonézia, hanesan presidente ASEAN, no Estadu membru sira hotu ASEAN nian, ba sira-nia kompromisu iha ami-nia prosesu adezaun ba ASEAN.

Ha'u hakarak mós agradese ba serbisu Malázia nian, hanesan País Koordenadór ba parseria ASEAN-Kanadá, ne'ebé reforsa promosaun ba envolvimentu polítiku ida ne'ebé pozitivu no ba relasaun ida ne'ebé metin entre ASEAN ho Kanadá.

Ho ksolok boot hodi rekoñese katak Kanadá fó apoiu tomak ba arkitetura rejionál ne'ebé lidera husi ASEAN no Perspetivas ASEAN nian ba Indo-Pasífiku, ne'ebé kontribui maka'as ona ba pás, estabilidade no prosperidade iha rejiaun ne'e.

Timor-Leste mós rekoñese importánsia hosi intensifikasaun esforsu sira ne'ebé halo ona atu haforsa komérsiu no investimentu entre ASEAN ho Kanadá liuhusi Deklarasaun Konjunta ASEAN-Kanadá kona-ba Planu Traballu ba Komérsiu no Investimentu tinan 2021-2025 no atividade sira Konsellu Empreziál Kanadá-ASEAN nian.

Timor-Leste goza relasaun ida di'ak tebes ho Kanadá, tantu iha nivel bilaterál nune'e mós iha fóruns multilaterais. Ami ansiozu atu reforsa tan relasaun ida-ne'e iha futuro, liuliu kona-ba ami-nia adezaun plena ba ASEAN.

Ami agradese ba apoiu kontínuu hosi Estadu Membro sira hotu husi ASEAN ba adezaun Timor-Leste nian. Tanba daudaun ne'e ami konsentra ami-nia atensaun hodi kumpre rekizitu sira hotu ne'ebé presiza ba ami-nia adezaun plena iha futuro, ami hein katak relasaun ASEAN-Kanadá bele sai forte liután no kontinua serbisu hamutuk ho ASEAN no ho Kanadá iha prosesu tomak.

Obrigadu, Señores Koprezidentes.